

## KOMUNIKADU IMPRENSA

Husi Bankada Parlamentar Fretilin – 13 Agostu 2018

### **FRETILIN Abstein Husi Votasaun ba Pedidu Urjénsia ba Tramitasaun ba Proposta Lei no. 2/V (1a) Orsamentu Jerál Estadu 2018**

FRETILIN la konkorda ho kalendáriu ba diskusaun ne'ebé apresenta.

Lei ne'ebé regula diskusaun OGE nian fó loron 30 ba diskusaun. Maibé governu ho ninia bankada husu atu halo diskusaun iha loron 16 nia laran. Bankada FRETILIN haree katak ba diskusaun OGE, loron 16 ne'e badak demais.

FRETILIN ezije mínimu loron 23 atu halo diskusaun ida adekuada no tuir regulamentu.

“OGE la'ós orsamentu suplementár ka hanesan ho orsamentu retifikativu. Artigu 56 husi Rejimentu la'ós aplikavel,” Representante Maria Angelica hatete.

Bankada FRETILIN mós apresenta dúvida kona-ba pedidu karáker urjénsia ne'e. Relasiona ho promulgasaun husi Prezidente da República ba Dekretu-Parlamentu no. 1/V, significa Estadu iha ona osan suficiente atu mantén funsionamentu Mákina Estadu até aprovasaun OGE.

“Osan \$140 miloins ne'ebé aprova husi Dekretu-Parlamentu nato'on hela. Ita uza lai \$140 miloins ne'e,” Representante Maria Angelica kontinua.

Governu mós seidak prepara livru balu OGE nian, liuliu Livru No. 2 ho 4A, 4B. Livru no. 2 apresenta Governu nia planu anuál sira. Se livru ida ne'e laiha, ida ne'e la diferente ho saku azul, situausaun ne'ebé Governu iha asesu ba osan atu gasta sein justifikasaun.

Livru 4A ho 4B apresenta rúbrika orsamentál ba órgaun Estadu hotu-hotu. Livru sira ne'e fó informasaun ho kompeténsia ba representante sira atu halo fiskalizaun.

“Governu dehan diskusaun ne'e urjente, maibé livru sira ne'e seidak kompletu. Livru No. 1 dehan Governu prevé \$1,8 miloins ba ministériu foun balu. Maibé organigrama governu nian mós seidak kompletu,” tenik Representante Maria Angelica.

Montante ne'ebé Governu atu foti exede ona RSE. Maibé Governu la hatudu justifikasaun ruma aseitavel atu investe iha ne'ebé, liuliu tanba ita iha de'it fulan 4 iha tinan fiskál ida ne'e.

FRETILIN iha Parlamentu Nasionál defende nafatin ninia kompromisu atu halo fiskalizaun ba atividade Governu nian. Nune'e FRETILIN ezije informasaun completa kona-ba proposta OGE 2018, atu halo diskusaun ida adekuada e ho tempu suficiente.

RAMATA

BA INFORMASAUN LIU TAN, FAVÓR KONTAKTA HO REPRESENTANTE MARIA ANGELICA RANGEL: 77238042

AVIZU: Aban tuku 9:00 dadeer, Bancada FRETILIN sei halo konferénsia de imprensa.